

# SAN PABLO KARTA TITO JÏI

## Pablo' Tito's fxi'jni

**1** <sup>1</sup>Adxa' Dxusna selpisáa Pablo yaaseth, Jesukristo jxkaahnisa. Txáasa Jesukristo tasxte nuypa'jwa'jsath Dxus txhitxnisa üstxna txáawe'sxtxi, kxah txáawe'sxwa Dxus yuwe isasa's jiyutxna, <sup>2</sup> bagaçxte yuhwa pçumée itxi fxi'zewa'ja's ji'phuya' sühna. Txáa pçumée itxi fxi'zewa'ja's Dxusa' peesya' neeyüuk Dxus isxiisamée naa kiwe meetey. <sup>3</sup>Txáasak txáa pçumée itxi fxi'zewa'ja's en ähte', kaajiyu'j kwe'sxtxi nwe'wesa Dxusa' adxna pta'sxwa'jsa nvxihtçxa. <sup>4</sup>Naa karta's fxi'jaçthu Tito adx nçxi'k na'wésag naa pa'ga. Txáasa e'zsay txáa na'wêçxaçxáa Dxusa's jïisatha'w. Dxus kwe'sx Tata vxite' kwe'sxtxi nwe'wesa Jesukristo txáawe'sx peeygähçxa pu'çxte', idxa' ewçxáa wêt fxi'zene'ga.

## Kreta kiwete Tito mjïini

<sup>5</sup>Mar pxähte Kreta kiwete idxa's nvxihtthu adx ma'wê neewe'weni's kxtey yuukahn. Txáa pa'gag idxa' kxtee yuwe puutx we'wena jxä'jnimée neeyüuk txáatx pheu'jna jxä'jçxa çxhab iisa dxuus yatte jxkaahwa'jsa ancianowe'sx pakweçxa ki'pna yuuwa'jsa neeyüu. <sup>6</sup>Anciano neeyüuwa'jsa' wala ew fxi'zesa yuutxna jxpubate yu'kxpehni yuuya'mée. Sa' peekx nyuu yakhçxáa fxi'zesa yuuwa'ja'. Aç'a' txáawe'sx luuçxa' Dxusa's nwēese'jsa yuuwa'ja', txä'wê Dxusa's nwēese'jmée ewmeetx yüuna fxi'ze' jïni yuuya'mée. <sup>7</sup>Dxuus yatte jxkaahwa'ja's jxpa'gasa' Dxus mjïia's thegwa'jsata', txáa pa'ga wala ew fxi'zewa'j ji'phta'. Vxitetx üuçxa we'wena juuna' thegna fxi'zewa'jme'. Tüuna, puii jxpakwena, vxyuuçxá's yajkçxa mjïiwal'jme'. <sup>8</sup>Txä'wê yüumée, ew yüuwa'jçxá's yajkxna fxi'zewa'ja', pa'jsatx yat pki'jna, ew üus yajkçxa we'wesa, Dxus dxi'pte ew fxi'zesa, Dxus yuuçxá's selpisáa, ma'wê fxi'zewa'ja'swa peekíi wala jxpa'yakxwa'ja'. <sup>9</sup>Dxus yuwe isasa pta'sxni yuuk txáate yuuçxáa txutemée fxi'zewa'ja', vxite jxpubasatx ewsa's kaapiya'jna kçxhãaçxha'jya', sa' Dxus yuwe isasa's açewe'wesatxwa ew kaajiyu'jya'.

<sup>10</sup>Txã'wëme!, Dxusa's açesa seena' wala üsta', selpimeesaçxá's we'wena nasatx kaypuba'jna. Nawa judiuwe'sx wejx thaakwe txã'wë yūuna üsta'.

<sup>11</sup>Txãawe'sx ïsxiini yuwe's jxukate kwe'we'jmée yuumeete!, yat iisa jxuka kaypuba'jna üsta' ewmeesaçxá's kaapiya'jna vxyuu knaywa'jçxá's yajkxçxa.

<sup>12</sup>Txajík teeçx wala jxtuhthesa kxteewe'sx txajx nwe'sxíçxáatx na'jīna we'we: Kretawe'sxa' wala ïsxihta', weesweesata', watxkuē nū'saçxáata' jīnak fxi'j. <sup>13</sup>Txã' isa yuh we'wek. Txãa pa'ga txãawe'sxtxi' juuna' mwe'we, kxah Dxus yakh jxpubamée jweeíçxáa çxhãçxhana u'jçxa, <sup>14</sup>judiuwe'sx ïsxiina kwentu'jni's nwëese'jmeetxna, sa' Dxus tasxuh txuteeçxa fxi'zesa jxkaahnitxwa nwëese'jmeetxna.

<sup>15</sup>Maawa üuste ewsa's ji'phsa', ew yaakxwa'j yuuçxá'sku ji'phu'. Nawa maawa üuste ewsa's ji'phmeesa', ewmeesa yuuçxá'sku yajkxna fxi'ze', txãa pa'gatey txãawe'sx üus yuu jxuka ewmeena naa pa'ga. <sup>16</sup>Dxusa's jiitha'w ji'tx, nawa Dxusa's jiisa na'wë yu' fxi'ze'çmeeta!, naasáa seena' kazsaçxáata', Dxusna ahçena kíhwa ewsa yu'sa' kaavxya'ja'jya' äjasameeta'.

#### Dxus yuwe ma'wë jxkaathe' txã'sçxáana kaapiya'jwa'ja'

**2** <sup>1</sup>Nawa idxa' Dxus yuwe ma'wë jxkaathe', txã'wëyçxáa kaapiya'jna mes. <sup>2</sup>Txã'wëme' piçthë'j thë'jsawe'sxa' kíhtewa jxuka jxpa'yakx fxi'zewa'ja's piyawa'j ji'phta', kíhsuwa kxtey yuuna, üus yajkxçxa jxpa'yakx we'wena, Dxus yuuçxá's üusuh jxuka yajkxna, peeygáawa'ja's peçxkanamée, makwe thëysa pa'thewa txáatxi' nxusmée fxi'zena txã'wë piyawa'j ji'phta'. <sup>3</sup>Txã'wëy u'y thë'jsawe'sxwa peekí wala jxpa'yakx zhiçxkwe fxi'zewa'j ji'phta'. Isameesaçxá's wëse'jçxa nuywe'wena fxi'zemée, tūunawa fxi'zewa'jsameeta!, ewsaçxá's kaapiya'jna fxi'zewa'jsata'. <sup>4</sup>Kxah kna'sa u'se iimi'sawa txãawe'sx nmi'tx peeygähna fxi'zeya' piyaatxna, txã'wëy peekx luuçxtxi peeygähna, <sup>5</sup>peekí wala jxpa'yakx kíhtewa jxuka ewçxáa fxi'zena, txã'wëy yattewa jxpa'yakx fxi'zena peekx nmi'tx nwëese'jna, kxah kim yuhwa Dxus yuwe's açewe'wemeetxna.

<sup>6</sup>Txã'wëy piçtakxwe'sxtxiwa myu'kxpeh ew zhiçxkwe fxi'zekahn. <sup>7</sup>Sa' kíhtewa jxuka idxa' ew mfxi'ze, kxah txãawe'sxwa iidx fxi'zeni's uyçxa', txã'wëy yūukahn. Kaapiya'jni'swa le'çxkwe yuhwa fxiymée jxuka isasa yuuçxá's mpeeta'sx. <sup>8</sup>Ew yuuçxáa yu'kxpehna mfxi'ze, kxah kim yuhwa i'kwe'sxtxi açesa ewmée nuywe'wewa'ja's uymeeçxa', thaameetxna.

<sup>9</sup>Selpisaatxwa myu'kxpeh, txãawe'sx patron jxkaahnitx kíhtewa jxuka nwëese'jna wa'lna üusçxa pasmée ewçxáa yuukahn, <sup>10</sup>kíh yuhnawa pesweemée ew yuuçxáa fxi'zekahn, kxah txãawe'sx ew fxi'zeni's uyçxa', nwe'wesa Dxus yuwe' wala zhiçxkwesa yu'ga jīnaçxáa we'wetxna.

<sup>11</sup>Dxusa' txajx peeygāani's kaavxya'ja'kh txã' maatxwa jxuka ewte nvxiitwa'jsa'. <sup>12</sup>Dxus peeygāani' ewmeesa's nvxihtna naa kiwete pkalte

fxi'zewa'jçxá's yaakxni'swa nvxihtçxa, peekíi wala jxpa'yakx fxi'zena Dxus yakh txutemée txá's yuuçxáa selpiina fxi'zewa'ja'sku jxkaaja'. <sup>13</sup>Txá'wëy Dxus peeygãani' kwe'sxtxi nwe'wesa Dxus Jesukristo jxtuhthesa kïjxa' neeyüuk txáa en âhpkaçx weçxana üyhasna üswa'ja'sku jxkaaja'. <sup>14</sup>Txáa Jesukristo' kïh ewmeejüwa kwe'sxtxi nwe'weçxa jxuka pkaltxi yaateçxa jxukate txáa jïi vxitya' kwe'sx pa'gate uuk. Ewsa yuuçxá's jxuka kxtey yuu jxthâasçxak txá'wë yüu.

<sup>15</sup>Txá'wë yüuwa'ja's kaapiya'jwa'j jì'phgu, kïh yüuwa'ja'swa üukhmée kçxhãaçxha'jna, ewmée yüukahmén yu'kxpehna. Idxa's kim yuhwa aqçena weeçxwa'j jì'phmeeta'.

### Dxus yakh fxi'zesawe'sxa' khuëswe'sxtxi nwëese'jwa'j jì'phta'

**3** <sup>1</sup>Yakhthê'jwe'sxtxi ki' mkaayaki'j maawa jxkaahsawe'sxtxi nwëese'jna, khuëswe'sxtxiwa jxuka nwëese'jna kïhwa ew yüuwa'j yu'sa' jxuka kxtey yuukah. <sup>2</sup>Kim yuhtxwa açewe'wewa'j jì'phmeeta', puii jxpakwena fxi'zewa'jsameeta' wejxwa üusuh jxuka ewçxáa yaakxwa'ja's jì'phuwa'jsata' nasa jxukaysatx peeygãhna.

<sup>3</sup>Nyafxiia' kwe'sxwa Dxusa's jiimeeçxa' nwëese'jsamée jxpubana naa kiwete ewmeesaçxá's pa'pçxuna puutx ewmeeçxáa yajkxna puutx yahçenaçxáa fxi'zesatha'w yu', seena' kazxsa. <sup>4</sup>Nawa kwe'sxtxi nwe'wesa Dxus peeygãani nasa jxukaysa jïi vxyaaçxa', kwe'sxtxi nwe'wek. <sup>5</sup>Nawa kwe'sx kakweju ew yüuna fxi'zepa'ga txá'wë yüume', naasáa peeygãhçxa yuuçxáak txá'wë nwe'we kwe'sx üuste pkaltxi yaatena. Txáa pa'gak Dxus Espiritu' kwe'sxtxi yu'pthehçxa kïh pkal yuhwa jì'phmée kaafxì'ze'je'.

<sup>6</sup>Nawa txá'wë nwe'wesa Jesukristopa'ga yuuçxáak Dxusa' txajx Espiritu's jxuka üs kwe'sxtxi, <sup>7</sup>kxah Dxus dxi'pte yuuwemeesa yuuna pa'jçxa pçumée itxi fxi'zewa'ja's jxpa'gakahnkku txá'wë peeygãhçxa nwe'we.

<sup>8</sup>Na'wë pta'sxthu txá' isa yuja', txáa pa'ga idxa' txáatxi' kaayaki'jna nes myuu, kxah Dxusa's üuste jxpa'gasa' ewçxáa yüuna fxi'zetxna. Txá'wë ew yüuna fxi'zenisa' wala seelpisa' jxukaysatx. <sup>9</sup>Nawa puutx we'weni seelpimeesatxi's mpa'yajkx, txániiteywe'sx kimçxah ne'ta yu' sa' kïhçxah ne'ta yuusáa yu' txáaçxáatx jiyu wëena fxi'zenitx, vxite' Moises leysu we'weçxa puutx puii wëenitx, vxite' puii jxpakwena fxi'zenitx. Txá'wësa' kïhte yuhwa seelpimeesata'.

<sup>10</sup>I'kwe'sx pkhaakhenitewe'sx maaíia' isameesaçxá's kaapiya'jna kaypuba'jwa'jsa kasejewáana aç'a' txá'sa' pa'yaçxa myu'kxpeh e'z uspkax. Nawa e'z us we'wetewa nwëese'jmeete', pkhaakhenijü kutxi'jçxa peena yu' kaapa'jal'jnu. <sup>11</sup>Txá'wëme' nasa txá'wë yüusa' bagaçxtewa pkalte yuuçxáa fxi'zewa'jsaçxa txá'wë yuuna.

### Tito's we'weni kïh yüuwa'ja'swa

<sup>12</sup>Artemas meeçxa' Tíkiko txáawe'sxtxi iidx tasxna adx kajaçpkaçxha', idxa' dud yuweene'ga Nikopoliste adx yakh puutx uyya', nus en

skhēwpkaçx kxtee ũsu'nja sūju'th. <sup>13</sup>Iidx ājani yu'sa' kīhtewa jxuka mpu'çx yuwee pu'çxsa Zenas vxite' Apolos txāawe'sx dxi'the peejini's, kxah kīhwa peejimée dxi'the u'jwetxna. <sup>14</sup>Aça' iidx txā'wē yūuni's uyçxa', kwe'sx yakhtē'jwe'sxwa selpiiya' piyaatxna ew yūuna peejinisu pu'çxya'.

**Pablo yuwe weçxaa kaahni**

<sup>15</sup>Adx yakh ũssa jxukaysa yuwe weçxaa kaja'tx. Aça' idxwa yuwe meen weçxa kwe'sx namikuwe'sx Dxus yakh jxpubamée fxi'zesatx. Dxusa' i'kwe'sx jxukaysatx pu'çxhina.